



Sesida dal

1. da matg 2018

Communità ils

2 da matg 2018

Protocol nr.

337

Dumonda Locher Benguerel

concernent la collocaziun da las requirentas e dals requirents d'asil minorens betg accumpagnads en il chantun Grischun independentamain da lur status

Resposta da la regenza

Tar la dumonda 1: Independentamain dal status da dimora sa tschenta la dumonda davart la structura da la collocaziun e da l'assistenza gia da princip pervia da la diminuziun dals dumbers da persunas minorennas betg accumpagnadas en il sector d'asil. Ensemen cun il departament d'economia publica e fatgs socials (DES) è il departament da giustia, segirezza e sanadad (DGSS) actualmain londervi d'eruir ils avantatgs ed ils dischavantatgs d'ina tala assistenza. Consequentamain è la regenza pronta d'examinar ina collocaziun da las requirentas e dals requirents d'asil minorens betg accumpagnads en il chantun Grischun independentamain da lur status.

Tar la dumonda 2: La finamira da l'uffizi da migraziun e da dretg civil (UMDC) sco er da l'uffizi dal servetsch social (USo) è quella d'accumpagnar ils giuvenils fin ad ina vita economicamain e socialmain autonoma. Tuts dus concepts prevesan differents stgalims d'intensitad per l'assistenza. En quest connex vegn adattada l'intensitad da l'assistenza tut tenor l'augment da l'autonomia.

Requirentas e requirents d'asil minorens betg accumpagnads (RMBA) vegnan assistids tras il UMDC en sias duas structuras a Trimmis ed a Tavau Laret. A tut ils scholars da l'onni supplementar a Schiers èsi reussì la stad passada d'entrar en la purschida transitorica Palottis. Tut ils RMBA cun interess sportivs fan part d'ina uniun da sport e nizzegian fitg gugent las purschidas multifaras. En cas da basegn survegnan tut ils RMBA las terapias psicologicas necessarias, adina en preschientscha d'in translatur intercultural. La maiortad da las persunas da passa 18 onns ch'eran entradas en Svizra sco RMBA, viva en gruppas d'abitar en il center da transit a Trimmis. Giu-

venils u persunas giuvnas creschidas che cumenzan cun in emprendissadi dastgan far midada, sch'els èn autonom avunda e sch'els giavischan er sezs quai. Cumentarmain a la collocaziun ed a l'assistenza dals giuvenils è er il process d'integraziun dal post spezialisà per l'integraziun dal UMDC ina premissa impurtanta per in svilup da success. Quel vegn concepì consequentamain tenor ils basegns individuals dals RMBA. Tut las persunas minorennas che n'èn betg pli obligadas d'ir a scola vegnan plinavant assistidas gia oz – independentamain da lur status – tras collavuraturas e collavuratur dal post spezialisà per l'integraziun. Tras la purschida da furmaziun 15+ a Cazas, che porscha orientaziuns specificas, e tras las purschidas transitoricas a Schiers ed a Cazas vegnan messas las basas da scola per entrar en il sistem da la furmaziun professiunala.

Persunas minorennas betg accompagnadas cun status da fugitiv (FMBA) vegnan assistidas da la fundaziun "Gott hilft" e da la Casa Depuoz (organisaziuns), fin che l'emprima scolaziun è terminada. Las organisaziuns han ina incarica da prestaziun per porscher assistenza a FMBA. En l'emprima fasa vegnan ils giuvenils assistids ed accompagnads durant 24 uras da las collavuraturas e dals collavuratur da las organisaziuns. Suentier circa 1 onn e mez midan ils giuvenils en gruppas d'abitar accompagnadas, nua ch'els vivan autonomamain. Per l'integraziun linguistica e professiunala profitan ils giuvenils da las purschidas che vegnan messas a disposiziun tras il post spezialisà per l'integraziun.

Tar la dumonda 3: Ensemen cun lur posts da servetsch sclereschan ils dus departaments DES e DGSS las pussaivladads e las variantas per ina structura d'abitar independenta dal status. En quest connex vegni examinà, sch'i fissan avant maun eventualas sinergias per ils concepts da RMBA / FMBA. Per quest intent han gi lieu pliras sesidas tranter il DGSS / UMDC ed il DES / USo. Ils resultats vegnan ad esser avant maun la stad 2018.



En num da la regenza

Il president:

Il chancelier:

Dr. Mario Cavigelli

Daniel Spadin